



Odgođeno suđenje uhapšenima u akciji Lipstick Odbrana nije dobila dokaze

Osmić pojasnio da se dokazi u vezi s posebnim istražnim radnjama umnožavaju

Suđenje Samiru Kurtoviću (32), Omeru Nargaliću (38) i Melisi Šehović (27), uhapšenim u operativnoj akciji **SIPA**, kodnog naziva Lipstick, jučer je u Kantonalnom sudu u Sarajevu odgođeno zbog nedolaska Veljka Čivše, advokata optuženog Nemanje Jankovića.

Na početku ročišta predsjedavajuća Vijeća, sutkinja Rozita Šimić istakla je da optuženi Janković nema branioca jer je advokat Čivša opravdao svoj nedolazak zbog ranije zakazanog ročišta u Okružnom sudu Banja Luka. Čivša je, pojasnila je sutkinja, Sudu dostavio obavijest u kojoj navodi da odbrana nije dobila dokaze od Tužilaštva, čime je onemogućeno pravo na odbranu i ravnopravnost pred sudom.

Tužilac Senad Osmić je istakao da je Tužilaštvo dio materijala ustupilo odbrani, ali da su još ostali dokazi vezani za provođenje posebnih istražnih radnji, koji se umnožavaju. Naredno ročište planirano je za 13. juni.

Kurtović se, prema optužnici, tereti da je od 2004. pa do oktobra 2015. organizovao i rukovodio prostitucijom na području KS-a. U tom periodu seksualne usluge u njegovoj organizaciji pružalo je više od 28 djevojaka, od kojih su najmanje dvije maloljetne. Tako je stekao imovinski korist od 1.793.000 KM. Novac je prao ulažući ga u razvoj stada domaćih životinja. Šehović se tereti da je u dogovoru sa Kurtovićem i sa djevojkama koje su pružale seksualne usluge, od 2014. pa do oktobra 2015. učestvovala u organizaciji i vođenju pružanja seksualnih usluga.

Janković je optužen da je kao policajac u PU Ilidža, saznao da Kurtović organizuje prostituciju, ali ga nije prijavio, već ga je kontaktirao i za sebe i svog prijatelja naručio dvije djevojke za pružanje seksualnih usluga, čije je usluge platio 350 KM, navodi se u optužnici. Nargalić se tereti za držanje oružja. Svi, osim Kurtovića, brane se sa slobode.

D. P.

Kurtović se tereti da je organizovao i rukovodio prostitucijom na području KS-a, čime je stekao korist od 1.793.000 KM

STEČENA KORIST



Kurtović tokom privođenja